



Taulogologo

AUKUSO—2022

LUFILUFIGA FAALEAGAGA

MANATU AUTU: SIITIAGA MAMALU O MARIA I LE LAGI

TUSI FAITAU

- Faaaliga 11: 19; 12: 1-6, 10
- 1 Korinito 15: 20-26
- Luka 1: 39-56



UPU TOMUA

O le a ou lē toe taina i tua le tili pe asaina le vao filifili o outou paia sausaugata aua ua uma ona tosi lauti ma mamanu faatiti. Ou te lē toe ta'ilia foi tulafanā o ou sa auā ua uma ona tuulaupua ma paepae faati'a i ulupaga, i le afua mai i ulugā tafega seia paia mulivaito'a, mai le papa lē gae'e o feoi o le talalelei, le malu taue'e o Aiga ma Tapaau, le afifio o tupu ma tamalii faapea foi le falase'ese'e o faleupolu o tofiga, auā e leai se potona te faaopopo pe toese. E leai foi se tautai matapalapala na te gafataulimaina faamatuaofaiva ona autalaina faameafafine toaga auā o le i'a e iviivia; o le fue lavelave.

Ae avea ia lenei avanoa e faafeiloa'i atu ai ma le agaga fiafia i le mamalu mauuluga o le Kapelania mai lava i ona afu mauululuga se ia pa'ia magāvaiiti. Faatalofa atu i le afifio o feoi o le talalelei o lupesina na fai'a o loo fa'afalelemalu i tafa e fia o le Kapelania.

A o se faatalofa i le afifio i le paia o Aiga ma Tapaau, le malutaue'e i tupu ma tamalii, alalata'i failauga ma faleupolu o tofiga, le mamalu i faletua ma tausī, le malosi o le Ekalesia ma fanau lalovaoa. Faatalofa faapi-toa foi i Afua-mai-mauga, Ao Sinasina ma Matua Tausi.

Ua fa'amalō le soifua manuia ma le lagi e mama. La tatou folauga o le faatuatua i lenei tausaga ua gagaa'e malie peitai sa tatou matemate lima sasaga o pausisi ma tauilo faamea ta'ita'i i se tofā a'o se faautaga a le tagata soifua pe o le a tua mani ā lenei folauga. Tatou te iluilu ma talotalo ia tu'u lā ae aua le fano lā. Ia to-togo pea malama fou ma susu'e vaiola ae faapulou vaiali. Ae ā lele ua to le tali ma sasa'a faauaga le alofa tunoa o le Atua ua tatou ausia ma faatili i tua le afa muamua o lenei tausaga ae o loo tino pea lo tou soifua. Ua tafa le ata o le ana nai Utumoe ua atoa tino o Vaatausili, ua lofia i tatou i suavai ola, ma lagona pea le tatalo a Leutogitupaitea, ua magāfetau soifua ae le magāfetau fano le tatou folauga tusa lava poo le faafefefefe o peau o'oo'o ma peau faamata'u o faatigātama'i o faama'i ma ni fa'afitauli, o loo lofia ai o tatou laufanua ma lo tatou siosiomaga.

Saga'i ane lāia ai o le tai pei o le upu i gātaifale. Tatou āleagaina le alofa o le Silisiliese ma momoli i le Atua lo tatou Tamā lavasiga o totoe o lenei tausaga i lana faasinomaga mamana ma lana taitaitama, aemaise o lana faaoloaga faaleagaga e āvagailima ai o tatou faiva ma tiute, faapea galuega o le faatuatua. Tatou sulufa'i foi ma le faatuatua mausalī i le fautua tatalo a le Tinā Pai'a, tatou te malu ai.

I le masina lenei o Aukuso i lona aso 15 e faamamalu ai e le Ekalesia aoao le sulufaga o le **SIITIAGA MAMALU O MARIA I LE LAGI**. O lea ua tonu ai se manatu tatou te asia poo le a se feautaumolimoli o lenei aoaoga paia a le Ekalesia e tōmaa'u ai le tā folauga o le faatuatua i lenei masina.

E ui i se Faatauva'a o le Tagata

O le **SIITIAGA MAMALU O MARIA I LE LAGI**: O se Faaeaea sili ona maualuga i le Tagata e Faalogo, Usutai ma Faia le Finagalo o le Atua (Lk 11: 27-28)

O lenei sulufaga o se faailoga o le **Faamamaluina** e le Ekalesia o le **Faeaea** faitoatasi a le Atua i le **Tinā o lona Alo**. O le faamamaluina e le Ekalesia o lo tatou manuōina foi lea o lō tatou agaga mitamita e auai i le patipatiga o le Faaeaea a le Atua i le Tinā Paia – O le faailoga o le mautufaaga ai o Maria i le mamalu o Keriso lona Alo i le ola e faavavau. **O lona uiga o le Siitiaga, o le auai lea o Maria i mamalu faa-Atua o Keriso.**

O le mea tāua e ao ona tatou manatuaina – o mamalu ma paia'aga uma o le Tina Paia e le aunoa lea ma le sootaga ma Keriso lona Alo. O lona uiga, ana leai le sootaga lea e leai ni mamalu ma paia'aga o Maria. E afua mai ia Iesu Keriso mamalu o Maria.

Faaaliga 11: 19; 12: 1-6, 10 (Lotoloto'i Maria ma lana Tama i le tau'a i le va o le Atua ma le Tiapolo)

O lenei faitauga mai le tusi a Fa'aaliga o loo faamatala mai ai le tau'a tele i le va o le Atua ma le tiapolo.

Tiapolo o le faailoga o le **talako** poo le **gata** lea i le Tusi a Kenese.

Fafine o le faailoga o le **Ekalesia (Maria)**
Taimaititi o Iesu

E faapei o le Fafine i le Fa'aaliga, le puapuagā ma le faasauāiga o le Ekalesia. Peitai, i le taunuuga o lenei fa'aaliga o loo peseina ai viivi'iga o le manumalo a'ia'i o le Atua ma Keriso i le tau'a ma le tiapolo. I lona tofiga fa'atinā, sa ogatotonu ma lotolotoi Maria i le tau'a a le Atua ma le alii o le lalolagi pei ona tā'ua i le faitauga. O lona uiga ua matua'i onomea ma tataua ona faasoa ma mautufaaga le Tinā Paia i olioliga o le manumalo a lona Alo.

O le Tusi lenei Fa'aaliga na tusia e faamalosiāu ma faalototele i le Ekalesia sauāiga ma puapuagātia. E faamautinoa ai i le Ekalesia o le taunu'uga o mea uma e manumalo a'ia'i lava le Atua ae faatoilaloina le tiapolo e faavavau. O lona uiga; 1) O se feau e faalototeleina ma faamafanafanaina tatou, auā afai tatou te manatu sa tausia ma puipuimalu Maria e le Atua e faapena foi ona ia tausia ma puipuimalu tatou mai puapuaga ma faatigātama'i o lenei olaga lē tumau. 2) E lē faasaolotoina tatou e le Atua e aunoa

ma ni puapuaga, ae na te aumai ia te i tatou le mana ma le malosi e manumaloina ma faatoilalo faigāta o lenei soifuaga.

1 Korinito 15: 20-26 (O Maria le Eva o le Feagaiga Fou)

I lenei faitauga o loo faamatala mai ai o Iesu o le Atamu fou. O lona usitai i le Atua le Tama na toe manumaloina ma faafouina ai mo i tatou meaalofa a le Atua na leiloa ona o le lē usitai o Atamu muamua. I le silasila a le Ekalesia, o Maria o le Eva o le feagaiga fou, o lona usitai i lona valaauina na tafieseā ma fauiiese ai mala ma le faasalaga na tupu ona o le lē usitai o Eva muamua. I le aso na asia ai le agelu, na folafola ai e Maria lona loto usitai i le Atua ma lona finagalo: **“Fa'auta, o a'u nei o le 'au'auna a le Ali'i; 'ia faia 'iā te a'u e tusa ma lana fetalaiaga.”** (Lk 1: 38). Na usitai ma talia fiafia e Maria lona valaauina e ui lava e lē lava sona iloa i le taunuuga ma aafiaga o lona valaau. Sa ia ave i le Atua lana ioega ma le faatuatua o ia na te aumaia le fesoasoani ma le lototele e faatino ai lona valaauina. E le'i tuulafoaina e le Atua Maria le tagata usitai, faatuatua ma le loto maualalo. Sa faaeaina e le Atua Maria e ala lea i le siitia o ia tino ma le agaga i le mamalu ua iai Keriso lona Alo. Le nofoalii o le ola e faavavau.

I nei aso ua toatele tagata ua saili le fiafia e ala lea i le faiga o latou lava loto, lē fia faalogo i se fautuaga a matua ma ē matutua, leai foi se usitai i ē ua tofia ma faauuina ma taitai. Ua latou manatu e maua le fiafia i le faamalieleina o le mea latou te loto i ai. Filemu pe a leai se tasi e usitai ma faalogo i ai.

O Maria o lo tatou faaitaita'iga sili, auā o lenei soifuaga e lē asa ma tiute ua tofofi i ai tatou – o tiute fai mo i tatou lava, o tiute fai mo tatou aiga ma isi tagata, aemaise tiute fai mo le Atua ma lona finagalo. O le tagata e talia o latou tiute pei o Maria, atonu e lē ato'atoa ona faamalieleina i le vaiaga faaletagata a o le silafaga a le Sililiese ua tau la latou taulaga. E manogi lelei i fofoga o le Sililiese. Ma latou te lanoga lava i o latou loto le faamalieleina.

Luka 1: 39-56 (Vivi'i lo'u Loto i le Alii)

Ina ua foi le agelu, sa le'i manatu Maria ia te ia lava ae sa ia lagonaina le tāua o lona alu e asi ma faamafanafana ia Elisapeta i lona mai. Fai mai le mau a le tusi, sa ia faateleā'i. O lona uiga sa naunau ma le alofa, faamuamua le popole ia Elisapeta na i lo ia. O se tasi nei o vituti tāua o le fa'asoo. Faamuamua isi ae lē o le manatu faapito i sota ita lava lelei. Faasoa faamanuiaga ma fetufaa'i le alofa mafanafana. E moni ai le upu a le tusi, **“O le mea ete fua ina atu e fua ina mai ia te oe”** Lk 6: 38. O le asiasiga a Maria nā telē se fesoasoani ia Elisapeta. Peitai e lē na o Elisapeta na manuia ai. Na faagaganaina e le Agaga Elisapeta ini upu alofa faalaeiau, ua faamautinoa ia Ma-

ria, ...“Amuia oe i fafine, ‘amuia fo‘i lē a fānau mai iā te oe. Pe fa‘apefea fo‘i lenei mea, ‘ina ‘ua sau le tinā o lo‘u Ali‘i iā te a‘u nei? Fa‘auta fo‘i, ‘ua o‘o mai le leo o lou alofa i o‘u taliga, ‘ona osoo ai lea o le tama i lo‘u manava ma le ‘oli‘oli. E manuia fo‘i le fafine e talitonu, e taunu‘u mea ‘ua fetalai mai ai le Ali‘i iā te ia.” Lk 1: 42-45. O laei e laei ai le soo poo le Kerisiano o le usitai ma faia le finagalo o lē pule i le galuega. **O Faamanuiaga mo e talitonu ma faia le finagalo o le Atua,** o le ute lena o le Evagelia. O le feau autū o le faitauga. Amuia le tagata e talitonu ma fai.

Peitai o le talitonu ma le faatuatua o Maria ua lē na oni upu e teuteuina ma valivali i pepa ma tusi faitau fa‘afaagogo ae o le talitonuga e ola ma galue. E fai lona tino. O le manuia o Maria e lē se tau pū se matūpalapala na tofi ona o lona talitonu a‘o lona olaina ma le savālia lona valaauina e ui i le faigata o puapuaga sa fetai‘i ma ia. E le‘i solomuli Maria ae sa ia faatino ma le usitai lona tofi mai le Atua. E lē faapea a tatou faatuatua ona faigofie lea ma leai ni

faafitauli o le soifuaga. Peitai o le faatuatua tatou te maua ai le malosi e manumālo ai i faafitauli ma faaosoosoga faafefefefe o lā tatou folauga.

O Maria o le So‘o pito sili le faamaoni o Iesu. O le mea lea ua faaeaea ai le Ekalesia ma avea ai o ia ma faata‘ita‘iga o so‘o uma o le Ekalesia. Tatou ola faapei o Maria, talitonu ma faia le finagalo o le Atua pe faigōfie pe faigāta. O le ala i le pule o le tautua. O lē foi e talitonu ma usitai e faaeaina. O lo tatou tau i le lagi lea.

Tatou tatalo i le alofa tunoa o le Atua faatasi ma le fesoasoani o le fautua tatalo a Maria ina ia tatou mau-tufa‘aga i lona faaeaina, ma le mamalu o lona Alo o Iesu Keriso lo tatou Alii ma lo tatou faaola.

Le Alii e, matou te ifo ma faafetai atu ia te oe. Auā o lou koluse paia na e faaolaina ai le lalolagi

Maria e, le Tina o le Ekalesia. Talosia matou o sulufai atu ia te oe

Ona o Keriso lo tatou Alii. Amene.

Fr Taisali Leuluai sdb

AFIOGA KATINALE JOHN DEW

Fa‘atalofa atu i le nu‘u o le Atua

I le fe‘au a Pope Faranisisi mo le Aso Misiona a le lalolagi 2022 ua ia toe fa‘aleo mai ai le vala‘au i Kerisiano uma ia avea ma molimau iā Keriso ma se tala‘iga fa‘evagelia lauaitete. O lo‘o ia fa‘amanatu mai i tagata uma o nei upu mai le Galuega a Aposetolo **“E fai fo‘i outou ma molimau iā te a‘u e o‘o lava i le tuluiga o le lalolagi”** (Galuega 1: 8).

O tatou malamalama ma loto i ai e avea i tatou ma molimau iā Keriso i aso uma? I mea uma ua tatou tau-tatala ai ma fai?

Pe o tatou manatu e avea i tatou ma molimau i galuega a Keriso? I auala ua tatou feagai atu ai i isi? Le fa‘atinoina o faiga o a tatou pisinisi o fa‘amaoni ma tonu?

Pe o matamata mai Keriso pe a tatou ta‘aalo i ni ta‘aloga? Po o le molimauina o le Evagelia e mamao ma o tatou mafaufau?

E anoanoa‘i mea e tautala ai, o le tomanatu i le tele o tusitusiga i nei aso e uiga i le Fegalegalea‘i (Fa‘asinoti). Sa tatou faia ni fa‘atalanoaga matagofie e uiga i le pule‘aga ma tagata ma fiafia i le avanoa ua aumai e le Fa‘asinoti iā i tatou. O lona uiga o le fesoasoani i tagata uma a le Atua:

Ina ia fa‘aosofiaina e ola ai ile Tala Lelei. Fai miti e uiga i le vala‘uina e avea i tatou ma Ekalesia Ia fa‘aolaola fa‘amoemoega o tagata Ia fa‘aosofiaina le fa‘atuatua i isi Ia fusufusia manu‘aga

Ia lalaga mafutaga ma le loto fou

Ia a‘oa‘o mai isi

Ia fausia auala laupapa

Ia fa‘amalamalamaina manatu

Ia fa‘amafanafana loto

Ia toe fa‘afo‘isia mai le malosi i o tatou lima mo le tala‘iga masani.

O le faia o mea uma ua ta‘ua i luga ua mafai ai ona avea i tatou ma **“molimau a Keriso i le gata‘aga o le lalolagi.”**

Ma Fa‘amanuiaga uma Lava

+ Ioane

Kia tau te rangimārie ki a koutou

I nai masina ua tuana‘i atu nei e faitau afe tagata sa ‘au atu i faigā Sinoti, tali atu i le vala‘aulia a Pope Faranisisi ina ia a‘afia i le atina‘e o se Ekalesia e Fegalegalea‘i. E to‘atele tagata sa fa‘aali le fiafia ma na olioli e avea ma vaega o lenei fa‘atalanoaga. Sa latou va‘aia i le toe aumaia o le Fonotaga a le Vatikano Lua i o tatou mafaufau ma o se auala e fa‘aauau ai le galuega a le Fonotaga. O tagata mai so‘o se vaega o le atunu‘u na fa‘aali se manatu o le fa‘aeaina sa mauaina i le mafai ona fa‘aleo o latou malamalama‘aga o le Ekalesia ma pe fa‘apefea ona tatou savavali fa‘atasi i luma. E malamalamaina, o nisi na fa‘aalialia le fa‘anoanoa, ita, lē fiafia ma le mafatia o le ekalesia e lē o se nofoaga sa latou fa‘amoemoe i ai; sa latou fa‘aalialia le mafatiaga ma le ita i tulaga o fa‘alavelave o sauaga; ma lenā, ona o Tagata o le Atua ua papatisoina, e lē

AFIGA KATINALE JOHN DEW

mafai i taimi uma ona fa'asoa a latou mealofa o ni tagatā palisi e galulue.

E tele ni mataupu ua fa'anoanoa ai tagata, fēitai ma fa'anoanoa ai. Ua aumai i luma nei mataupu ma e tatau ona fa'atalanoaina fa'avā o malō ma loto i fale. E mafai ona tatou faia le tele o na mea i le taimi nei, e lē tatau ona toe fa'atali mo le Sinoti i Roma ia Oketopa o le tausaga a sau. O lea ua amata ona tatou faia e ala i le Fonotaga a Ositaulaga ma le Fonotaga Fa'alafulemū a le Pule'aga, i le va'ava'ai ma tomanatu i mea o lo'o fai mai ai tagata. Ou te fa'amalosi'au iā outou uma e va'ai i mea e mafai ona outou faia e fa'agalue ai vaega e mafai ona fa'alelei atili.

Na maofa tagata ma aumai le agaga o le fa'afetai mo le fa'agasologa o le Fa'atalanoaga Fa'aleagaga ma lona fa'amamafa i le iloatino. O le tatalo ma le lēleoa na talisapaia atoatoa ma na fa'aalia so'o o lenei faiga e mafai ona avea ma a tatou faiga masani o le galulue fa'atasi. Ou te lagolagoina atoa lenei manatu ma fa'amalosi'au i tagata e fa'aogā i fonotaga ma fa'apotopotoga a le Ekelsia lenei auala tatalo o le

galulue fa'atasi. Mafaufau pe fa'apefea se tulaga e i ai pe afai o a tatou fonotaga uma e fa'aoga lenei faiga:

Vaega muamua o le fa'asoa....”**i la'u tatalo i le asō....ma ou te manatu....**

Vaega lona lua o le fa'asoa.....” **I le leo o le fa'apotopotoga i lenei aso ua ou fa'alogoina....Sa ou fa'alogo i le Agaga Pa'ia o fa'apea mai....ma na ou maua ai a'u i se fa'alogo'aga**

Vaega tolu o le fa'asoa...**fa'alogo, talanoaga, tomanatuga ma le faia o fa'ai'uga.**

O se faiga loloto lenei Katoliko o le galulue fa'atasi, tatalo ma le fa'alogo, tomanatuga ma taunu'uga i se fa'ai'uga. Se'i manatu a'e pe fa'apefea pe a tatou galulue uma fa'apenei!

Ma fa'amanuiaga uma lava. Nāku noa. Nā

+ Ioane

UA AUMAI I LUMA E SALĀMO LE MAMALU MA LE MATAGOFIE O LONA ALOFA

Mai lava i lona amataga na tolaulauina, manatunatu ma patipatia e le Ekalesia Salāmo o se 'oa tele o tatalo ua fa'aalia mai ai le mafutaga a le Atua i le tagata. O Salāmo ua fa'aalia ai o tu masani ma fa'alogo'aga ma fa'aalia ai le natura ma le a'afiaga mafana a le Atua i le ola ai o le tagata. Sa avea ma ni punavai o le fa'aosofiaga mo latou uma e fa'amatalaina mea uma tau i le Atua. I lana folafolaina o le Tausaga Pa'ia o le Alofa, *Misericordiae Vultus*, na tusia e Pope Faranisisi pe na fa'apefea e Salāmo ona folafolaina le alofa o le Atua. I se auala fa'apitoa ua aumai e Salāmo i luma le mamalu o ana gaioga alofa: “*O lē fa'ama-galo au amio leaga uma lava; o lē fa'amaloloina ou ma'i atoa uma; O lē fa'aolaina mai lou ola ai le tu'ugamau; o lē fa'apaleina oe i le alofa ma le alofa mutimuti vale*” (Salamo 103 – 4). O le agalelei o le Atua e lē o se fa'amatalaga ae o se moni maumaututū ua fa'aalia mai ai le alofa, o le alofa a se tamā po'o se tinā, gaioi i le loloto o le alofa mo a latou fanau.

O Sagato Athanasius i lana tusi iā Macellinus i le fa'auigaina o Salāmo sa ia tusia e fa'apea: o Tusi o Salāmo o lo'o maua ai se ituaiga o sa'o atoatoa

mo latou e to'aga e tatalo... e pei o se togala'au... ona ou te talitonu o le i ai atoa o le tagata, le uiga ma le fa'agaioiga o manatu, ua fuaina ma si'omia i na lava upu a le fai Salamo. E aogā ai le tomanatu i salamo o se togala'au ua fua tele mai e maua i ai gaioga uma o fa'ato'aga a le tagata ua ofoina maia ni va'aiga ia i latou ua fa'alogo ma tataloina salamo i le 'matagofie o le agalelei o gioiga a le Atua'. O tusitusiga a le Vatikano II – Fa'aaliga Mamana ua fa'amanatu mai iā i tatou o le Atua e tautala i gagana e malamlamaina 'mai le atoaga o lona alofa' ma a'afia uma ai latou o ni fa'auō 'ina ia vala'au ma talia i latou i lana fa'atasiga.

Alofa o se tasi o vaega fa'ailogaina e le fai Salāmo. O lo i ai Salāmo ua tautala fa'apitoa i le alofa o le Atua ma e a'afia i le fa'anumeraina masani, Salamo 25, 41, 42/43, 51, 57, 92, 103, 119, 136. Faia o le Salāmo 103 o se fa'ata'ita'iga, o se Salāmo e feso'ota'i ia Tavita, ua amata ma fa'ai'u i laina e tutusa: 'Lo'u Atua e, ia e fa'amanū atu i le Ali'i. O lenei vivi'i i le Atua o se ituaiga puipui ua fa'ava'a ai le Salāmo; o se salāmo o le vivi'i ae pei ona masani ai i Salāmo, o se vi'iga ua avatu e tali atu ai i le alofa o le

UA AUMAI I LUMA E SALĀMO LE MAMALU MA LE MATAGOFIE O LONA ALOFA

Atua. Fuaiupu 4 ua tautala mai pe fa'apefea i le Atua ona 'fa'apaleina oe i le agalelei ma le alofa fa'amaoni' e mafai fo'i ona fa'aliliuina e fa'apea, 'o ai lava ua fa'apaleina oe i le alofa ma le agalelei'. O le upu alofa i le Eperu o le *hesed* ma e mafai ona fa'aliliuina o le agamalū, kalasia, alofa, fa'amagaloga, agalelei, ma le alofa tutumau. O le upu agalelei i le Eperu o le *rahamin* ma ua fa'asino lea i le agalelei mamana o le alofa mai totonu, ua fa'aalia o se alofa e loloto, malosi ma fa'atinā. Alofa ma le agalelei ua avea ma lima e lua, e pei ona i ai, o le Atua o lo'o afisia se tasi i le alofa. O lenei alofa lē fa'atuā'oia ua folafolaina mai i fuaiupu 8 ma le 10: *E alofa mutimuti vale ma alofa fua mai le Ali'i; e tele gese lona to'asa ae tele lona alofa. E lē a'oa'i mai pea lava ia; e lē fa'amoemoe fo'i lona to'asā e fa'avavau. E le'i faia e ia iā i tatou e tusa ma a tatou amio leaga.* O lo'o vala'au mai le Salāmo iā i tatou ia faia, muamua se uiga o le vivi'i, o lenei tapua'iga i le Atua ua faia ai se avanoa mo tagata ta'ito'atasi e

fa'alogoia ai le alofa ma le agalelei ua ofoina mai e le Atua i tagata uma, o lenei fa'alogoia ua ofoina mai i tagata ta'ito'atasi se avanoa matagofie, le aiā po'o se taimi talafeagai, e ulufale atu ai ma fa'atasi ai ma le Atua.

O le folafolaina o le Tausaga o le Alofa e le'i 'mauaina' le manatu o le alofa o le Atua, ae ua vala'uina Kerisiano ina ia maitauina lenā o se vaega o le Atua, i se auala e lē mafaitaulia ua i ai i le olaga ma tu masani a le Ekalesia. O Salāmo o ni vaega o le fa'a – Kerisiano talu mai le amataga, o le latou patipatia o le agalelei o le Atua o se mea e masani ona fa'ailoaina e le fa'apotopotoga. O le Tausaga o le Alofa e masani o se vala'uina mo Kerisiano ta'ito'atasi fa'apea fa'apotopotoga ina ia avea ma a latou lenā moni ua fa'ailoa mai e Salāmo ma ola ai i le fa'atuatua.

SAGATO LOLESIO TIAKONO MA LE MALETILE (D. 258?)

5

O le fa'aaloogia ua faia e le Ekalesia iā Lolesio ua va'aia i le tulaga o fa'amanatuga i nei aso ua avea ma sulufaga. E itiiti lava so tatou malamalama i lona olaga. O ia o se tasi o i latou o a latou maliu fasia na totō ai se lagona loloto i le Ekalesia anamua. O le fa'amanatuina o lana sulufaga na salalau vave. O ia o se tiakono Roma i le ta'ita'iga a Pope Sagato Sixtus II (Aukuso 5). Fa aso talu ona fasiotia lenei pope, o Lolesio ma faife'au e to'afa na maliliu fasia, masalo o le vaitau o fa'asauaga a le tupu o Valerian.

O fa'amatalaga logologoā o lona maliu sa iloaina i Tamaseko, Prudentius, Ambrose ma Aukusitno. Sa fausia se malumalu i luga o lona tu'ugamau o se tasi o falesā autū e fitu i Roma ma o se nofoaga mata'ina o malagasā i Roma.

O LE TALA

O se tala'aga lauiloa na alualua'i mai taimi anamua. Ona o se tiakono i Roma, o Lolesio na tu'u i ai le va'aiga ma le matafai oi mo 'oa lelei a le Ekalesia, ma le tufatufaina o mealofa i tagata matitiva. Ina ua iloaina e Lolesio o le a saisaia o ia e pei o le pope, sa ia feso'ota'i atu i le au matitiva, fafine ua maliliu o latou tane ma tamaiti ua leai ni mātua i Roma ma avatu i ai o tupe uma sa iā ia, na o'o lava i ipu pa'ia na fa'atau ina ia fa'ateleina ai se tupe e maua. Ina ua fa'alogo i ai le faipule a Roma i nei faiga, sa manatu o Kerisiano e tele ni a latou 'oa. Sa ia 'āmia Lolesio ma fai atu i ai, "O outou Kerisiano ua fai mai o matou

e fa'asauā iā outou, ae lē o le mea lenā o lo'o i lo'u mafaufau. Ua aumai le tala o a outou faife'au ua ofoina atu 'auro, o le toto pa'ia ua talia i ipu siliva, e i ai a outou tulagā sela 'auro i a outou sauniga i afiafi. A o lenei o la outou kapite ua fai mai e tataua ona avatu iā Kaisara mea a Kaisara. Aumai nei 'oa – e mana'omia e le tupu e tausia ai ana fitafita. E le faia e le Atua tupe ina ia faitauina: Na te le'i sau ma aumai tupe i le lalolagi – ua na o upu. O le mea lea, aumai ia te a'u tupe, ma ia fa'aoloina oe i upu."

Na tali atu Lolesio o le Ekalesia e mau'oa. O le a ou fa'ailoa atu iā te oe se vaega tāua. Ae tu'u mai se taimi e fa'avasega uma ai mea ma faia se lisi o fa'amaumauga." I le tolu aso na mulimuli mai ai sa ia fa'apotopoto uma mai tagata tauaso, pipili, manunu'a, lepela, leai ni matua ma fafine e leai ni tane ma laina fa'atasi uma i latou. Ina ua taunu'u le faipule, na fa'apea atu Lolesio, "O 'oa nei a le Ekalesia."

Na matuā ita tele le faipule ma fai atu ia Lolesio o le a fa'ataunu'uina lona mana'o e oti – ae o le a faifai mālie. Sa iā ia se ū'amea tugu vilivili ua uma ona saunia, ma malala i lalo ifo ma na tu'uina atu i ai le tino a Lolesio. I le mae'a o puapuagatia a le maletile mo se taimi umi, fai mai le tala fa'asolopito, sa faia e Lolesio se tala fiafia fa'apea, 'O lenā ua lelei atoa. Liliu loa ma 'ai!"

‘Au’ auna Fa’au’uina i le Ekalesia i Aso Nei

E pei o isi sakalameta, o se a’oa’oga mai taimi ua tuana’i na mua’i aumaia se manatu o le telosia Katoliko i ositaulaga e tataua ona toe su’esu’eina. O ni sa’ili’iliga na fa’aalia ai o faife’au mai taimi ana-mua sa avea ma toea’i’ina e itiiti ni matafaioi ma na o epikopo sa vala’auina o ositaulaga, mo se fa’ata’ita’iga. O le isi vaega na fa’ate’ia lona iloina i luma atu o le seneturi 12 o le to’atele o ositaulaga ma epikopo sa fa’aipoipo. O ni su’esu’ega fou fa’atusi pa’ia sa fa’apea lona fa’alavelave. Sa fa’aali mai ai sa leai se tofiga aloa’ia fa’aositaulaga i fa’apopotoga Kerisiano anamua.

I le tatalaina o le Fonotaga Lona Lua a le Vatikano o le telosia a le ositaulaga ma le fa’atulagaina o le auaunaga na toe fa’ailoa i le tele o tulaga o tu masani. O suiga tetele i manatu na sau i le aga’i atu i epikopo. I lo’o pule, o le Fonotaga a le Vatikano Lua na aumaia se fa’atusa o ni faife’au. I taimi ua tuana’i na va’aia ai epikopo o ni ositaulaga ua umia ni tulaga tau ofisa maualuga, o a’oa’oga fa’aositaulaga na fa’aalia ai o le ofisa fa’aepikopo o se tofiga maualuga fa’atelosia.

O le Vatikano Lua na fa’alateleina le manatu a le Ekalesia i auaunaga, e lē na o le aga’i fa’alafulemū atu i le tofiga ositaulaga ma le epikopo ae i le fa’amalosi’auina le a’afia o isi i auaunaga a le Ekalesia. Na vala’au mo le toe fa’afoi mai o le tofi tiakono tumau, o se ‘au’aunaga o le a tatala atu mo ali’i fa’aipoipo matutua fa’apea ali’i talavou ma le au nofofua. O galuega a ali’i ma tama’ita’i a ituaiga sa maitauina o ni ‘au’aunaga o le tatalo ma le tau-tua. O tagatā lotu Katoliko fo’i sa fa’apea na fa’asoa i le tala’iga a Keriso ma ‘au’aunaga fai.

E tele ni fesili na tula’i mai i le mae’a o le Fonotaga ma o lo’o fa’aauau pea i le taimi nei. O le fa’aopopoina o numera o latou ‘ese’ese e le’i fa’au’uina mo auaunaga ua tula’i mai ai le fesili i matafai o ia ositaulaga ma le uiga o le fa’au’uga,

aemaise i le va’aiga o le fa’aitiitia o numera o le tele o ositaulaga ua matutua. O se malamalama’aga lautele i ‘au’aunaga ua fa’apea mai o Kerisiano uma ua vala’uina e avea ma ‘au’auna i se isi manatu, aemaise pe afai o le olaga Kerisiano ua maitauina o se olaga o le ‘au’aunaga i isi.

O le elemene ‘autū a le ‘au’auna fa’au’uina na fa’ailoa e le Fonotaga a le Vatikano Lua, ina ua va’ai i ai mai le manatu mai tala fa’asolopito, ua fa’aalia ai le fa’aogaina fa’aonaponei o le upu ositaulaga ua olaola i le alu ai o le taimi; o le toe aumai o le malamalama fa’atulagaina o le ‘au’aunaga fa’aositaulaga o le a mafai ai e le Ekalesia ona fa’amatala le tofi ositaulaga i le manatu o lana tala’iga, ma, mulimuli lava, o lena ‘au’aunaga ua fa’asino tonu i le manatu o le a’afiaga o le ‘au’aunaga ma le tala’iga.

Na saili e le Fonotaga ina ia avatu e lē gata o le tofi ositaulaga i le papatisoga ma le ositaulaga fa’au’uina se fa’avae mautū i le tofi ositaulaga a Keriso ma na amata i le tatalo fa’asauniga a le Ekalesia o se nofoaga o le tofi ositaulaga a Keriso (SC 7). O le vaivaiga a le tulaga a le Fonotaga, e ui i lea, o le fa’aogaina ole upu ‘ositaulaga’, e lē sa’o ma manino lelei ae le fa’auigaina. O le manatu a le Fonotaga ina ia fa’ailoa le tofi ositaulaga a lē ua papatisoina ma le tofi ositaulaga fa’au’uina o ni elemene i le fa’alateleina o le faiga fa’asakalameta, ae o fa’atinoga moni e manino ma ‘ese’ese, e malamalamaina lelei pe a va’ai i le va feagai ai a le epikopo ma le ositaulaga, le epikopo ma le tiakono, le tiakono ma le ositaulaga, ma latou nei ma tagatā lotu. O le uiga tāua a le ositaulaga papatisoina o le au ai o le tagatā lotu i tatalo fa’asauniga a le Ekalesia o se tagata masani ma le tataua...*ona muta ai lea o lenei tusitusiga.*

TOE FA’AFOUGA MAMANA (fa’aauau mai lomiga talu ai)

O Le Ala a le Atali’i Fa’amaumau’oa.

(Faitau Luka 15: 11 – 32) – tu’u atu le avanoa ia outou le au faitau e faitau ai le tala.

E le’i mata’itū le Tamā i le salamō a le Atali’i

Manatua o le salamō a le atali’i e lē moni, fa’avae i luga o ona mana’oga i lo le salamō. Ina ua alu atu le tamā ia te ia ma fusi mai o ia, na fa’atatope mai ana upu ma fenunumi mai lona salamō – e

masalomia sa a’oa’o le faia o upu ma le leo. Ina ua ia faia ia faiga, ua foliga mai o le tamā e lē o fa’alogo atu i ai. Sa ia taofi atu i lona atali’i ma fa’atonu ‘au’auna e fa’aofu o ia i ofu aupito sili le matagofie ma tu’u ni mama i ona tama’ima’ilima.

O fa’ailoga nei o le tulaga o le aiga. Ua toe fa’ala-

valavaina e le tamā lenei ali'i talavou i lona tama-li'i'aga o se atali'i ma se suli. Ua ia toe fa'afo'ia mai lenei atali'i i le aiga e aunoa ma le ta'ua o lona salamō pe otegia atu fo'i le atali'i.

E lē masalomia, i ni feiloa'iga ma tagata pe a patipatia le Sakalameta o le Fa'aleleiga, i taimi o mafatiaga e lē fa'amatalaina ma le uiga 'ese o lona matagofie. O nisi o taimi pe afai e tagata le gaioiga o le salamō ma taofiofi ai pea i manatu ma fa'apea ai e tatau i le Atua ona fa'asalaina i latou. Ona tatou manatu a'e lea pe o le a so latou manatu e uiga i le fa'atusa o le Atua. E to'atele ua manatu o le Atua e tau ma sui ma e totama'i. E lē o le Atua lenei o lo'o fa'aalia mai e le fa'ata'oto o le atali'i fa'amaumau'oa.

E maofa ai ona i le moni e lē o āno atu lava le tamā i le salamō a le atali'i. Ua tatou iloina e lē fa'atonuina e Iesu le salamō, ae mana'omia ona tatou āuāuina fa'aleleia i le fa'aleagaga ma le loto atoatoa. E le'i fa'amāasia e le tamā le atali'i. Na te le'i tu'ua i lalo o ia. Na te le'i mata'itū fo'i i le salamō, po'o le agasala.

O le a la le mea o lo'o ta'u maia iā i tatou pe a sau i se ituiga o Ekalesia ua vala'uina ai i tatou e le Atua? O lona uiga e lē o fa'apea mai tatou te lē amana'iaina le moni o le agasala pe gaioi atu i se fa'atasiga tau amio lelei. Ae ui i lea, ua vala'uina i tatou ina ia agalelei i isi iā latou agasala ma le fa'aletonu e pei ona alofagia i tatou e le Atua ma tomanatu pe fa'apefea ia i tatou o ni palisi ma pule'aga, ona tomanatu i le loto o le Tamā i isi.

Na Te Le'i Fa'alumaina

Fai mai se tasi o tamā ana fa'apea o ia lea e i le fa'ata'oto lenei, e masalomia e va'aia atu ua aga'i mai le atali'i lea e masalo e alu i se potu e mata-mata ai le TV. A ulufale mai le ali'i lenei o le a fai atu i ai se tala fa'auiā fa'apea – “oi ua e toe sau? Na ou fai atu lava ae le fa'alogo mai.”

E lē o le tamā lea na fa'aailoa mai e Iesu i le tala. E leai se fa'alumaina i le loto o le tamā. O le loto o le Tamā ua na o le alofa lava.

O lenei moni e mafai ona lu'itauina o tatou fa'atusa o le Atua le Tamā, aemaise pe afai na fa'afaiileina i tatou mai a tatou agasala, ua tatou fa'atigā i le Atua. I se manatu fa'anatura i ai, e mafai ona tatou fa'apea o le agasala e masani ose solitulafono i le Atua, o lē e pa'ia ma alofa atoatoa. O le tele o tagata i nei aso e leai se malama'aga tele fa'atelosia ma le filosofia e fesoasani ai iā i latou e malamalamaina ai le

'ese'ese i le manatu o le uiga o le fa'atigā i le Atua. O le tele o tagata o le upu “fa'atigā” ua tu'u i le uiga o le va fealoa'i fa'aletagata. A tatou “fa'atigā” i se isi, ua tatou faia se mea ua matuā ita tele ai iā i tatou.

I lenei manatu fa'aletagata ma le so'otaga, e lē o afaina le Atua iā tatou agasala; e leai se fa'alumaina. Afai la o tatou o se Ekalesia o le a atagia mai ai le loto o le Tamā i le lalolagi, ona tatau lea ona tatou tauivi ma le va'ai mamao o le avea ma Ekalesia e lē fa'alumaina lē ua agasala i le sa'ili o le fa'amagaloga – e ui tatou te lagoina latou te le'i fa'aalia le salamō i le auala ua tatou manatu sa tatau ona uia.

Sa iā Ia se Manatu Fa'anatinati

Ina ua fa'atonu e le tamā ana 'au'auna e fa'aofu lona atali'i ma tu'u ni mama i ona tama'ima'ilima, ua ia fai atu ia faia fa'apea “fa'avavevave.” Aua ne'i alu se taimi. Fa'avave ona tu'u ni se'evae i ona vae. Topetope, topetope, topetope. Ua tatou va'aia i lenei fa'anatinati o se fa'amanatu o le tamā na tamo'e atu i lona atali'i ma o se fa'amanatu tele o le fa'aleleiga, fa'afo'isia, ma le patipatia o ni galuega fa'avavevave a le Ekalesia. Fai mai Sagato Paulo o tatou “o lenei o sāvali i matou ia Keriso, peiseai ua 'ai'oi mai le Atua iā te outou e ala iā i matou” (2 Korinito 5: 20).

E fa'anoanoa ai lava le loto pe a fa'alogo atu i palisi o lo'o tatou galulue ai o fa'apea mai e i ai se taimi aga'i atu i mea fa'aevagelia – po'o lea tausaga po'o le lua o tausaga i luma atu. O fea o i ai le agaga o le fa'anatinati? O se mea ua sili atu ona tāua ua mafai ona tatou faia. Aua le tolo mea!

Taumafai e avea ma fa'amuumua e tatau ona fai – ma e lē na o latou i totonu o puipuiga a lau palisi. E tele palisi e fa'apea, “tatou a'apa atu muamua iā i latou o lo'o i totonu.” E le mafai ona toe toloina le tala'iga iā i latou o lo'o i fafo atu. E tatau ona tatou tomanatu i le loto o le Tamā, ma avea ma se Ekalesia ua vala'uina i tatou.

Na i ai se tala i se tagata na alu atu i lana epikopo e talanoa e uiga i le lumana'i o se polokalame i le pule'aga. Na fai i ai le epikopo ona e le'i i ai ni fuafuaga e amata ai ni mea fou – fa'aauau mea o lo'o i ai nei. Na fememea'i lea tagata. Ua foliga mai o lo'o i ai i se va'a fa'aola ma ua filifilia e lē lavea'ia nisi tagata ona ua lē lava mea e tausi ai i latou.

Leai, e alu atu ma lavea'i tagata ua mālelemo! Lavea'i muamua tagata ona fuafua ai lea o isi mea

e tula'i mai. E mana'omia ona tatou vala'au i le Agaga Pa'ia e toe fa'aleleia le Ekalesia – iā i tatou – se manatu loloto fa'avavevave o le a tafe mai le alofa sauā mo lana fanau.

Ua Ia Fasi le Povi Peti

O le fasia o le povi peti ua fa'ailoga ai le amataga o se fa'amanatuga – aemaise lava, o a mea tatou te fa'amanatuina – ua fa'atonutonu ai le aganu'u a se fa'apotopotoga, e a'afia ai a tatou palisi ma pule'aga. A tatou fa'amanatuina se tagata, mea na tupu po'o se mea mata'ina, ua tatou fa'asoa atu lona tāua. I se fa'aupuga fa'amanatuga o se ituaiga o tau, o le mea lea e tatau ona tatou taumafai e fai ma le loto i ai e uiga i le fa'amanatuina o mea tatau.

I lenei fa'ataoto, ua ta'u mai e Iesu mea ua patipatia e le Atua: *le toe fo'i mai o e ua leiloa.* Mo le Atua o se mea ua sili le tāua. O fa'apefea ona fa'atusa lenā i mea o tatou o se Ekalesia ua ave i ai le fa'amuamua? O a mea ua tatou fa'amanatuina?

8

E masani tatou te fa'amanatuina o ai lava na i ai mo se taimi umi: O lenei tagata ua atoa le lua-sefulu lima tausaga talu ona i ai i'inei; se'i o tatou ave i ai se pine. O le isi lea tagata ua fa-sefulu tausaga; ave i ai ni pine se lua.' O tagata ua toe fo'i i le Ekalesia e leai ni pine, e o'o lava i le fa'aילוaina o latou igoa. E lē o ni mea nei e fa'amanatu e le Atua.

Va'ai ia Luka atoa, mataupu sefululima. Ua tu'uina mai e Iesu ni fa'ata'oto se tolu: o le fa'ataoto o le mamoe na leiloa, tupe na leiloa, ma le atali'i fa'amaumau'oa. O nei fa'ataoto e i ai nai mea e tutusa ai: o se mea na leiloa, se mea na toe maua mai, ma sa fai se fiafia.

O le fafine ile fa'ataoto o le tupe na leiloa na vala'auina ana tuā'oi e o mai ma faia se fiafia ina ua ia toe maua le tupe na leiloa. O se mea mālie tele lenei: ua toe maua e le fafine le tupe e tasi ae masalo e lua ni tupe na fa'aalu i le faia o le fiafia ona ua toe mauaina le tupe e tasi. O le tamā o aiga lenei a le malō o le Atua; e fa'apena ona galue le Atua.

Ae o le fesili e fa'apea: e fa'apefea i tatou o se palisi, o se pule'aga, ma ona tua atu ona fa'amanatu mea ua fa'amanatuina e le Atua ae ua na o tatou? E fa'apefea ona tatou fa'amanatu pe a tatou a'apa atu i tagata o lo'o i fafo atu? O le mea ua sili atu lona tāua mo i tatou o se palisi o le a

fesoasoani atu i tagata e feiloa'i atu ia Iesu Keriso i ni aualea e suia ai olaga ma toe fo'i, pe sau mo le ulua'i taimi, i le Ekalesia ma sakalameta. O mea na ua tatou fa'amanatuina. O le patipatia ma le fa'amanatuina o le toe fo'i mai o tagata ia Iesu ua avea nei ma vaega tu'ufa'atasia a le olaga o palisi i le tele o atunu'u.

E iā Ia le Loto mo le Uso Matua

I le tele o palisi e i ai lava sina fa'afitauli mo le ituaiga o "uso matua," o lē e tomumu pe a amata ona avatu i fafo le va'ai a le palisi ma amata e le fa'apotopotoga ona patipatia ma fa'amanatu le toe fo'i mai o le 'au fa'amaumau'oa. E faigatā tele ona agalelei, alofa, ma onosa'i i nei uso matutua ona o le tauaso e va'aia i le tāua o le toe fo'i mai a le fa'amaumau'oa. A faitau lelei le tala, o le tamā e i ai lona loto i le uso matua e pei o le atali'i fa'amaumau'oa! E loloto le alofa a le tamā mo i la'ua uma.

O le mea moni lava o a tatou palisi ua tumu i uso matutua. Atonu e lē iloaina se'iloa e amata ona va'ai lau palisi i le misiona po'o le tala'aiga. E amata loa e se fa'apotopotoga ona aumai se lagona fa'anatinati, si'i lana va'ai i tua atu o puipui a le palisi, ma amata ona fua mai ni fua, o uso matutua o le a alia'e, ma e lē fiafia. O le manatu o ta'ita'i o le a filifili e lē fa'a'auto lo latou va'ai i le fa'afailleleina, fa'amanatuina, ma le saogalemū o le fa'apotopotoga o lo'o i ai nei, ae fa'aalu o latou taimi, tupe, ma puna'oa i le tala'iga, o se mea e fou ia i latou.

A o Iesu lava ia na fai mai, "O ai 'ea so outou e ana mamoe e selau, afai e leiloa le tasi, e lē tu'ua e ia le ivagafulu ma le iva i le vao, ae alu ma saili i lē ua leiloa, se'ia maua?" (Luka 15: 4). Pe masalomia o latou sa fa'asoa i ai e Iesu lenei fa'ata'oto na toē i le 'a'amu ma le fa'atausua'i. Mo leoleo mamoe e mafaufau lelei, o se manatu e lē sa'o. O le tali i le fesili a Iesu e faigofie lava: e leai se isi o le a tu'ua le lafu atoa ae alu atu e sa'ili le mamoe e tasi. O nei leoleo mamoe sa tu'u atu atoa o latou olaga ia latou lafu. E le fa'aleagaina a latou taumafaiga mai aso e tele i le sailia o se mamoe e tasi. Fa'agalo le tasi; o se leiloa ua talia...*fa'auaau pea...*

Ua 'a'auina atu o Paulo ma Panapa i nu'u 'ese.

1. Sa i le ekalesia i Anetioka o nisi perofeta ma a'oa'o; o Panapa, ma Simeona 'ua igoa 'iā Nikeru, ma Lukio le Kurene, o Manaena sa tausia fa'atasi o ia ma Herota le tupu, 'atoa ma Saulo. 2. O latou o 'au'auna i le Ali'i ma anapopogi, 'ona fetalai mai lea o le Agaga Pa'ia, "Totofi ia mo a'u o Panapa ma Saulo i le galuega 'ua 'ou vala'auina ai i lā'ua." 3. Ona anapopogi lea o i latou ma tatalo, ma fa'ae'e o latou lima 'iā te i lā'ua, 'ona tu'uina atu lea o i lā'ua e o.

Galuega 13: 1 – 3 Mai ta'ita'i e to'alima, e to'alua misionare: o le auina atu o Panapa ma Saulo

I le fa'aumaina o le tala o le ta'ita'iga a Peteru o le Ekalesia amata, ua fa'aauau nei e Luka le tala a Paulo, o le a a'afia tele ai le vaega o totoe o le tusi. Ioe o le vaega lona lua lenei o le tala'aga ua tatau ona fa'aigoaina "O Galuega a Aposetolo." O ni tagata e to'alima ta'uta'ua o perofeta ma a'oa'o a le ekalesia – ua a'afia ai ma Simeona na ta'ua o le tagata uliuli, o se Afelika (Lukio le Kurene), ma se pa'aga tamaitiiti a Herota Anati-pa – ua va'aia i'inei o lo'o tatalo ma anapogi. O Panapa ma Saulo ua filifilia e le Agaga Pa'ia ma auina atu e faia mea ua ta'ua e le Agaga "o galuega." O galuega, e pei ona i ai, o fa'apuga mai Sapakuka i le fuaiupu 41 ua ta'ua mea ua faia e le Atua ma se mea e lē talitonu i ai le au tauemu.

O Le Tala'iga muamua na amatina Kuperu

4 O lenei, 'ua 'a'auina nei tagata e le Agaga Pa'ia, 'ona o lea o i lā'ua i Selukeia; 'ua folau atu nai lea mea i Kuperu. 5 'Ua i Salamina, 'ona la folafola ai lea o le afioga a le Atua i sunako o tagata Iutaia; 'ua 'au'auna fo'i Ioane Mareko 'iā te i lā'ua. 6 'Ua latou so'o i le motu, 'ua o'o atu i Pafu, 'ua iloa ai e i latou le tasi taulaitu, o le perofeta pepelo, o le Iutaia, o Paiesu lona igoa; 7 sa i ai o ia i le suikonesula, o Sekio Paulo, o le tagata fa'autauta lea; na 'a'ami lenei tagata 'iā Panapa ma Saulo, 'ua mana'o i le fia fa'alogu i le afioga a le Atua. 8 A o Elima le taulaitu, (auā o le uiga lea o lona igoa,) 'ua tete'e mai o ia 'iā te i lā'ua, 'ua fia fa'aliliu 'ese atu e ia i le suikonesula i le fa'atuatua. 9 A o Saulo, o Paulo fo'i lea, 'ua tumu o ia i le Agaga Pa'ia, 'ua pulato'a 'iā te ia. 10 'Ona fa'apea atu lea o ia, "O oe na 'ua tumu i le pepelo uma ma le ulavale uma, o le atali'i o le tiapolo, o 'ino'ino i le amiotonu uma lava; 'e te lē se'i sōia 'ea lou fa'api'opi'o i ala tonu o le Ali'i? 11 Fa'auta nei, o le a o'o 'iā te oe le 'a'ao o le Ali'i, e tauaso oe,

'e te lē va'ai i le lā mo sina taimi." "Ona pa'ū loa lea 'iā te ia o le popogi ma le pouliuli; 'ona fealua'i lea o ia ma sālili ni tagata e ta'ita'i 'iā te ia. 12 'Ua iloa fo'i e le suikonesula le mea na faia, 'ona fa'atuatua lea o ia, 'ua matuā ofo i le a'oa'oga a le Ali'i. 13 'Ua tu'uva'a atu Paulo ma lana 'au malaga i Pafu, 'ua o'o i latou i Pereka i Pafulia; 'ua tu'ua fo'i i lā'ua e Ioane, 'ua toe fo'i o ia i Ierusalem.

13: 4 – 13 Panapa, Saulo, ma Ioane Mareko ua fa'aevageliaina Kuperu

O le ulua'i a'apa atu a le tagata ua ta'ua e tu masani a Kerisiano "le a'apa atu a Aposetolo i tagata o Nu'u 'ese" o se toe fa'amatalaga fa'alua mai lea o elemene ua fa'amatala ai le a'apa atu a Filipo i le au Samaria ona fa'apea ai lea ma Peteru i le auaiga o Tagata o Nu'u'ese a Konelio. A o feiloa'i atu Filipo, i le tagata o Simona, o le malosi a le tevolo o lo'o i ai i le lalolagi fa'apaupau o maneta ma na fa'aleagaina lenā malosi e le Agaga O le Atua, o i'inei la le to'atolu o le au misionare Anitioka ua feiloa'i atu i lenā lava malosi pogisā i le tagata o se faimaneta o ia se Iutaia aposetata, Elima le taulaitu. Maitau o le Aposetolo, na mua'i fa'ailoa mai ma lona igoa Iutaia, Saulo, i le tu'i ma'aina o Setefano (Galuega 7: 58), o lenei ua vala'auina i lona igoa Latina, Paulo (v. 9 masalo o se igoa tauvala'au, ona o *paulus* o lona uiga "itiiti), atonu ona o lana tala'iga ua na mo Tagata o Nu'u'ese e amata atu nei.

Na taufaifai Paulo i le taulaitu, tu'ua'ia o ia i le toe liliuina o fuafuaga a le Atua, "fa'asaoina fo'i o mea pi'opi'o e fai ma ala laulelei a le Ali'i" (fa'atusatusa Luka 3: 5, ta'ua o Isaia 40: 3 – 5, "Ina teuteu ia outou le ala o le Ali'i"). Ma o le fa'asalaga a lē o le taulaitu ua o gatasi ma le i'uga e le umi a Paulo ina ua taofia o ia i lona taumafai atu e te'ea fuafuaga a le Atua i le fa'apotopotoga i le Ala i Tamaseko (va'ai Galuega 9: 6 – 11, o Paulo na tauaso mo sina taimi, ua auina atu i le Auala Sa'o!). Fai mai Luka ua latou fa'aevageliaina le motu mai le fua i le tafu'e (mai Salamina i sasa'e aga'i atu i Pafu i sisifo), o fa'amatalaga ua na o le fa'aliliuina o le kovana a le motu, Sekio Paulo, le ulua'i so'o mai Nu'u'ese a Paulo. O Sekio mo Paulo a o Konelio mo Peteru... *fa'auaau pea...*

SAKALAMETA

E pei o isi sakalameta, o se a'oa'oga mai taimi ua tuana'i na mua'i aumaia se manatu o le telosia Katoliko i ositaulaga e tataua ona toe su'esu'eina. O ni sa'ili'iliga na fa'aalia ai o faife'au mai taimi anamua sa avea ma toea'i'ina e itiiti ni matafaioi ma na o epikopo sa vala'auina o ositaulaga, mo se fa'ata'ita'iga. O le isi vaega na fa'ate'ia lona iloaina i luma atu o le seneturi 12 o le to'atele o ositaulaga ma epikopo sa fa'aipoipo. O ni su'esu'ega fou fa'atusi pa'ia sa fa'apea lona fa'alavelave. Sa fa'aali mai ai sa leai se tofiga aloa'ia fa'aositaulaga i fa'apotopotoga Kerisiano anamua.

I le tatalaina o le Fonotaga Lona Lua a le Vatikano o le telosia a le ositaulaga ma le fa'atulagaina o le auaunaga na toe fa'ailoa i le tele o tulaga o tu masani. O suiga tetele i manatu na sau i le aga'i atu i epikopo. I lo'o pule, o le Fonotaga a le Vatikano Lua na aumaia se fa'atusa o ni faife'au. I taimi ua tuana'i na va'aia ai epikopo o ni ositaulaga ua umia ni tulaga tau ofisa maualuga, o a'oa'oga fa'aositaulaga na fa'aalia ai o le ofisa fa'aepikopo o se tofiga maualuga fa'atelosia.

O le Vatikano Lua na fa'alauteleina le manatu a le Ekalesia i auaunaga, e lē na o le aga'i fa'alafulemū atu i le tofiga ositaulaga ma le epikopo ae i le fa'amalosi'auina le a'afia o isi i auaunaga a le Ekalesia. Na vala'au mo le toe fa'afoi mai o le tofi tiakono tumau, o se 'au'aunaga o le a tatala atu mo ai'i fa'aipoipo matutua fa'apea ali'i talavou ma le au nofofua. O galuega a ali'i ma tama'ita'i a ituaiga sa maitauina o ni 'au'aunaga o le tatalo ma le tautua. O tagatā lotu Katoliko fo'i sa fa'apea na fa'asoa i le tala'iga a Keriso ma 'au'aunaga fai.

E tele ni fesili na tula'i mai i le mae'a o le Fonotaga ma o lo'o fa'aauau pea i le taimi nei. O le fa'aopopoina o numerā o latou 'ese'ese e le'i fa'au'uina mo auaunaga ua tula'i mai ai le fesili i matafai o ia ositaulaga ma le uiga o le fa'au'uga, aemaise i le va'aiga o le fa'aitiitia o numerā o le tele o ositaulaga ua matutua. O se malamalama'aga lautele i 'au'aunaga ua fa'apea mai o Kerisiano uma ua vala'uina e avea ma 'au'auna i se isi manatu, aemaise pe

afai o le olaga Kerisiano ua maitauina o se olaga o le 'au'aunaga i isi.

O le elemene 'autū a le 'au'auna fa'au'uina na fa'ailoa e le Fonotaga a le Vatikano Lua, ina ua va'ai i ai mai le manatu mai tala fa'asolopito, ua fa'aalia ai le fa'aogaina fa'aonaponei o le upu ositaulaga ua olaola i le alu ai o le taimi; o le toe aumai o le malamalama fa'atulagaina o le 'au'aunaga fa'aositaulaga o le a mafai ai e le Ekalesia ona fa'amatala le tofi ositaulaga i le manatu o lana tala'iga, ma, mulimuli lava, o lona 'au'aunaga ua fa'asino tonu i le manatu o le a'afiaga o le 'au'aunaga ma le tala'iga.

Na saili e le Fonotaga ina ia avatu e lē gata o le tofi ositaulaga i le papatisoga ma le ositaulaga fa'au'uina se fa'avae mautū i le tofi ositaulaga a Keriso ma na amata i le tatalo fa'asauniga a le Ekalesia o se nofoaga o le tofi ositaulaga a Keriso (SC 7). O le vaivaiga a le tulaga a le Fonotaga, e ui i lea, o le fa'aogaina ole upu 'ositaulaga', e lē sa'o ma manino lelei ae le fa'auigaina. O le manatu a le Fonotaga ina ia fa'ailoa le tofi ositaulaga a lē ua papatisoina ma le tofi ositaulaga fa'au'uina o ni elemene i le fa'alauteleina o le faiga fa'asakalameta, ae o fa'atinoga moni e manino ma 'ese'ese, e malamalamaina lelei pe a va'ai i le va feagai ai a le epikopo ma le ositaulaga, le epikopo ma le tiakono, le tiakono ma le ositaulaga, ma latou nei ma tagatā lotu. O le uiga tāua a le ositaulaga papatisoina o le au ai o le tagatā lotu i tatalo fa'asauniga a le Ekalesia o se tagata masani ma le tataua...*ona muta ai lea o lenei tusitusiga.*

E le'i mata'itū le Tamā i le salamō a le Atali'i

Manatua o le salamō a le atali'i e lē moni, fa'avae i luga o ona mana'oga i lo le salamō. Ina ua alu atu le tamā ia te ia ma fusi mai o ia, na fa'atope mai ana upu ma fenunumi mai lona salamō – e masalomia sa a'oa'o le faia o upu ma le leo. Ina ua ia faia ia faiga, ua foliga mai o le tamā e lē o fa'alogo atu i ai. Sa ia taofi atu i lona atali'i ma fa'atonu 'au'auna e fa'aofu o ia i ofu aupito sili le matagofie ma tu'u ni mama i ona tama'ima'ilima.

O fa'aailoga nei o le tulaga o le aiga. Ua toe fa'alavalavaina e le tamā lenei ali'i talavou i lona tama'li'i'aga o se atali'i ma se suli. Ua ia toe fa'afo'ia mai lenei atali'i i le aiga e aunoa ma le ta'ua o lona salamō pe otegia atu fo'i le atali'i.

E lē masalomia, i ni feiloa'iga ma tagata pe a patipatia le Sakalameta o le Fa'aleleiga, i taimi o mafatiaga e lē fa'amatalaina ma le uiga 'ese o lona matagofie. O nisi o taimi pe afai e tagata le gaioiga o le salamō ma taofiofi ai pea i manatu ma fa'apea ai e tatau i le Atua ona fa'asalaina i latou. Ona tatou manatu a'e lea pe o le a so latou manatu e uiga i le fa'atusa o le Atua. E to'atele ua manatu o le Atua e tui ma sui ma e totama'i. E lē o le Atua lenei o lo'o fa'aalia mai e le fa'ata'oto o le atali'i fa'amaumau'oa.

E maofa ai ona i le moni e lē o āno atu lava le tamā i le salamō a le atali'i. Ua tatou iloina e lē fa'atonuina e Iesu le salamō, ae mana'omia ona tatou āuāuina fa'aleleia i le fa'aleagaga ma le loto atoatoa. E le'i fa'amāasia e le tamā le atali'i. Na te le'i tu'ua i lalo o ia. Na te le'i mata'itū fo'i i le salamō, po'o le agasala.

O le a la le mea o lo'o ta'u maia iā i tatou pe a sau i se ituaiga o Ekalesia ua vala'uina ai i tatou e le Atua? O lona uiga e lē o fa'apea mai tatou te lē amana'iaina le moni o le agasala pe gaiou atu i se fa'atasiga tau amio lelei. Ae ui i lea, ua vala'uina i tatou ina ia agalelei i isi iā latou agasala ma le fa'aletonu e pei ona alofagia i tatou e le Atua ma tomanatu pe fa'apefea ia i tatou o ni palisi ma pule'aga, ona tomanatu i le loto o le Tamā i isi.

Na Te Le'i Fa'alumaina

Fai mai se tasi o tamā ana fa'apea o ia lea e i le fa'ata'oto lenei, e masalomia e va'aia atu ua aga'i mai le atali'i lea e masalo e alu i se potu e mata-mata ai le TV. A ulufale mai le ali'i lenei o le a fai atu i ai se tala fa'auiā fa'apea – “oi ua e toe sau? Na ou fai atu lava ae le fa'alogo mai.”

E lē o le tamā lea na fa'aailoa mai e Iesu i le tala. E leai se fa'alumaina i le loto o le tamā. O le loto o le Tamā ua na o le alofa lava.

O lenei moni e mafai ona lu'itauina o tatou fa'atusa o le Atua le Tamā, aemaise pe afai na fa'afaiileleina i tatou mai a tatou agasala, ua tatou fa'atigā i le Atua. I se manatu fa'anatura i ai, e mafai ona tatou fa'apea o le agasala e masani ose solitulafono i le Atua, o lē e pa'ia ma alofa atoatoa. O le tele o tagata i nei aso e leai se mala-malama'aga tele fa'atelosia ma le filosofia e fesoasao ai iā i latou e malamalamaina ai le 'ese'esega i le manatu o le uiga o le fa'atigā i le Atua. O le tele o tagata o le upu “fa'atigā” ua tu'u i le uiga o le va fealoa'i fa'aletagata. A tatou “fa'atigā” i se isi, ua tatou faia se mea ua matuā ita tele ai iā i tatou.

I lenei manatu fa'aletagata ma le so'otaga, e lē o afaina le Atua iā tatou agasala; e leai se fa'alumaina. Afai la o tatou o se Ekalesia o le a atagia mai ai le loto o le Tamā i le lalolagi, ona tatau lea ona tatou tauivi ma le va'ai mamao o le avea ma Ekalesia e lē fa'alumaina lē ua agasala i le sa'ili o le fa'amagaloga – e ui tatou te lagoina latou te le'i fa'aalia le salamō i le auala ua tatou manatu sa tatau ona uia.

Sa iā Ia se Manatu Fa'anatinati

Ina ua fa'atonu e le tamā ana 'au'auna e fa'aofu lona atali'i ma tu'u ni mama i ona tama'ima'ilima, ua ia fai atu ia faia fa'apea “fa'avavevave.” Aua ne'i alu se taimi. Fa'avave ona tu'u ni se'evae i ona vae. Topetope, topetope, topetope. Ua tatou va'aia i lenei fa'anatinati o se fa'amanatu o le tamā na tamo'e atu i lona atali'i ma o se fa'amanatu tele o le fa'aleleiga, fa'afo'isia, ma le patipatia o ni galuega fa'avavevave a le Ekalesia. Fai mai Sagato Paulo o tatou “o lenei o sāvali i matou ia Keriso, peiseai ua 'ai'oi mai le Atua iā te outou e ala iā i matou” (2 Korinito 5: 20).

E fa'anoanoa ai lava le loto pe a fa'alogo atu i palisi o lo'o tatou galulue ai o fa'apea mai e i ai se taimi aga'i atu i mea fa'aevagelia – po'o lea tausaga po'o le lua o tausaga i luma atu. O fea o i ai le agaga o le fa'anatinati? O se mea ua sili atu ona tāua ua mafai ona tatou faia. Aua le tolo mea!

Taumafai e avea ma fa'amuumua e tatau ona fai – ma e lē na o latou i totonu o puipuiga a lau palisi. E tele palisi e fa'apea, “tatou a'apa atu muamua iā i latou o lo'o i totonu.” E le mafai ona toe toloina le tala'iga iā i latou o lo'o i fafo atu. E tatau ona

tatou tomanatu i le loto o le Tamā, ma avea ma se Ekalesia ua vala'auina i tatou.

Na i ai se tala i se tagata na alu atu i lana epikopo e talanoa e uiga i le lumana'i o se polokalame i le pule'aga. Na fai i ai le epikopo ona e le'i i ai ni fuafuaga e amata ai ni mea fou – fa'auau mea o lo'o i ai nei. Na fememea'i lea tagata. Ua foliga mai o lo'o i ai i se va'a fa'aola ma ua filifilia e lē lavea'ia nisi tagata ona ua lē lava mea e tausi ai i latou.

Leai, e alu atu ma lavea'i tagata ua mālelemo! Lavea'i muamua tagata ona fuafua ai lea o isi mea e tula'i mai. E mana'omia ona tatou vala'au i le Agaga Pa'ia e toe fa'aleleia le Ekalesia – iā i tatou – se manatu loloto fa'avavevave o le a tafe mai le alofa sauā mo lana fanau.

Ua Ia Fasi le Povi Peti

O le fasia o le povi peti ua fa'ailoga ai le amataga o se fa'amanatuga – aemaise lava, o a mea tatou te fa'amanatuina – ua fa'atonutonu ai le aganu'u a se fa'apotopotoga, e a'afia ai a tatou palisi ma pule'aga. A tatou fa'amanatuina se tagata, mea na tupu po'o se mea mata'ina, ua tatou fa'asoa atu lona tāua. I se fa'aupuga fa'amanatuga o se ituai-ga o tau, o le mea lea e tataua ona tatou taumafai e fai ma le loto i ai e uiga i le fa'amanatuina o mea tataua.

I lenei fa'ataoto, ua ta'u mai e Iesu mea ua patipatia e le Atua: *le toe fo'i mai o e ua leiloa*. Mo le Atua o se mea ua sili le tāua. O fa'apefea ona fa'atusa lenā i mea o tatou o se Ekalesia ua ave i ai le fa'amamua? O a mea ua tatou fa'amanatuina?

E masani tatou te fa'amanatuina o ai lava na i ai mo se taimi umi: O lenei tagata ua atoa le lua-sefulu lima tausaga talu ona i ai i'inei; se'i o tatou ave i ai se pine. O le isi lea tagata ua fa'asefulu tausaga; ave i ai ni pine se lua. O tagata ua toe fo'i i le Ekalesia e leai ni pine, e o'o lava i le fa'aioaina o latou igoa. E lē o ni mea nei e fa'amanatu e le Atua.

Va'ai ia Luka atoa, mataupu sefululima. Ua tu'ui-na mai e Iesu ni fa'ata'oto se tolu: o le fa'ataoto o le mamoe na leiloa, tupe na leiloa, ma le atali'i fa'amaumau'oa. O nei fa'ataoto e i ai nai mea e tutusa ai: o se mea na leiloa, se mea na toe maua mai, ma sa fai se fiafia.

O le fafine ile fa'ataoto o le tupe na leiloa na vala'auina ana tuā'oi e o mai ma faia se fiafia ina

ua ia toe maua le tupe na leiloa. O se mea mālie tele lenei: ua toe maua e le fafine le tupe e tasi ae masalo e lua ni tupe na fa'aalu i le faia o le fiafia ona ua toe mauaina le tupe e tasi. O le tamā o aiga lenei a le malō o le Atua; e fa'apena ona galue le Atua.

Ae o le fesili e fa'apea: e fa'apefea i tatou o se palisi, o se pule'aga, ma ona tua atu ona fa'amanatu mea ua fa'amanatuina e le Atua ae ua na o tatou? E fa'apefea ona tatou fa'amanatu pe a tatou a'apa atu i tagata o lo'o i fafo atu? O le mea ua sili atu lona tāua mo i tatou o se palisi o le a fesoasoani atu i tagata e feiloa'i atu ia Iesu Keriso i ni auala e suia ai olaga ma toe fo'i, pe sau mo le ulua'i taimi, i le Ekalesia ma sakalameta. O mea na ua tatou fa'amanatuina. O le patipatia ma le fa'amanatuina o le toe fo'i mai o tagata ia Iesu ua avea nei ma vaega tu'ufa'atasia a le olaga o palisi i le tele o atunu'u.

E iā Ia le Loto mo le Uso Matua

I le tele o palisi e i ai lava sina fa'afitauli mo le ituai-ga o "uso matua," o lē e tomumu pe a amata ona avatu i fafo le va'ai a le palisi ma amata e le fa'apotopotoga ona patipatia ma fa'amanatu le toe fo'i mai o le 'au fa'amaumau'oa. E faigatā tele ona agalelei, alofa, ma onosa'i i nei uso matutua ona o le tauaso e va'aia i le tāua o le toe fo'i mai a le fa'amaumau'oa. A faitau lelei le tala, o le tamā e i ai lona loto i le uso matua e pei o le atali'i fa'amaumau'oa! E loloto le alofa a le tamā mo i la'ua uma.

O le mea moni lava o a tatou palisi ua tumu i uso matutua. Atonu e lē iloaina se'ilogā e amata ona va'ai lau palisi i le misiona po'o le tala'aiga. E amata loa e se fa'apotopotoga ona aumai se lago-na fa'anatinati, si'i lana va'ai i tua atu o puipui a le palisi, ma amata ona fua mai ni fua, o uso matutua o le a alia'e, ma e lē fiafia. O le manatu o ta'ita'i o le a filifili e lē fa'a'auto lo latou va'ai i le fa'afailleleina, fa'amanatuina, ma le saogalemū o le fa'apotopotoga o lo'o i ai nei, ae fa'aalu o latou taimi, tupe, ma puna'oa i le tala'iga, o se mea e fou ia i latou.

A o Iesu lava ia na fai mai, "O ai 'ea so outou e ana mamoe e selau, afai e leiloa le tasi, e lē tu'ua e ia le ivagafulu ma le iva i le vao, ae alu ma saili i lē ua leiloa, se'ia maua?" (Luka 15: 4). Pe masalomia o latou sa fa'asoa i ai e Iesu lenei fa'ata'oto na toē i le 'a'amu ma le fa'atausua'i. Mo leoleo .

O le tali i le fesili a Iesu e faigofie lava: e leai se isi o le a tu'ua le lafu atoa ae alu atu e sa'ili le mamoe e tasi. O nei leoleo mamoe sa tu'u atu atoa o latou olaga ia latou lafu. E le fa'aleagaina a latou taumafaiga mai aso e tele i le sailia o se mamoe e tasi. Fa'agalo le tasi; o se leiloa ua talia...fa'auaau pea.mamoe e mafaufau lelei, o se manatu e lē sa'o. O..

Avea lenei avanoa tāua e matou te fiafia e fa'afeiloa'i atu ai i le afio mai o lau Afioga Patele Taisali Leulua'i. O le Afioga ia Patele o lo'o i Niu Sila nei mo lana malologa, peita'i ua lagonaina le agaga fa'afetai ona o avanoa fa'a-auro e lē 'au maua, ua mafai ai fo'i ona taliaina se



fa'atala'u'ula mo lau fesoasoani. Lea ua mafai ona tu'uina mai lona avanoa mo le fa'atinoga o tatou Misasa Samoa ona o le to'a o lo'o feagai ma i tatou i le lēto'aitiiti o Ositaulaga Samoa. E lē toe na ma le laina e ui lava ina o lo'o i ai le Afioga ia Patele Mareko ma le Afioga ia Patele Andrew, ae ao lava ona ave le fa'amuumua i totonu o a la palisi e tusa ma lo la'ua Tofiga o Pule o Palisi. A maua lo la'ua avanoa, ua fesoasoani mai mo a tatou Misasa i le gagana Samoa. O le i ai o le Afioga ia Patele Leulua'i i le Laumua nei, ua maua ai le avanoa e fa'amāmā – avega ai mo la Afioga ia Patele Andrew ma Patele Maleko.

Ua mae'a ona feiloa'i atu le Afioga ia Patele i le Tama o le Pule'aga le Afioga i le Katinale John Dew, ma ua fa'afiafiaina lana Afioga ona o lenei avanoa o le Afioga ia Patele Taisali. O le Afioga ia Patele Taisali Leulua'i o le taulaga tagata a'o se Lupe fa'alele a le Toafia a Malietoa Taulapapa ma le latou Tama, o Usoali'i taua 'ma e na au i Ao'. Ma le Fetalaiga ia Saleutogi Po'e o le limamatua o faleupolu o Tofiga. Le afio'aga o Solosolo.

Fa'afetai tele i Lau Afioga Patele mo lou avanoa. Alofagia e le Ali'i ina ia fesoasoani le 'ea malū o le laumua nei i lou soifua laulelei. Manuia tele ou faiva fa'aositaulaga.



Ole Aso Sa 31 Iulai 2022 sa faataunuaina ai le Taulaga Paia ole Misasa mo le Ekalesia Samoa St Thomas Moore i le Aai o Napier. Ole Afioga ia Patele Taisali Leulua'i sa feagai ma le Osiga ole Misasa. Molimauina le maopopo ma le galulue fiafia ole Ekalesia i le faatinoga o lo latou faatuatua, e ui lava ina sa feagai ma luitau ole koviti e pei lava ona silafia, aemaise foi ole le alofia ole moemoenoa ma le laufa leaina, peita'i e le o solomuli le Aulotu Samoa a Napier i galuega ole Faatuatua, o se molimau lea a le Afioga ile Faa-Tama le Fetalaiga ia Tuisalega Farani. Sa faapea foi ona faataunuaina ai ma le Semina o ni faamalosiua faaleagaga sa saunoa i ai le afioga ia Patele. Ole sauniga Paia ole

Misasa sa faapea fo'i ona faapaiaina ai ma Tofi Fou ole Ekalesia atoa ai ma isi faalapotopotoga a le Ekalesia i Napier. Momoli le Faafetai tele ma le faamalo ile maualuga o le Ekalesia ona o lo outou soifua galulue aemaise le Alofa ile Atua ma lana Ekalesia. Viia le Alii ma ia manuia lo outou soifua tautua e ala i le faamaopopoina o nai o tatou tagata i totonu o Napier. Alofa tele atu mo lau Afioga ile Faa-Tama ma le Faletua aemaise le Afioga ile taitaifono ma le Ofisa ae tainane le nofo a matafale e fia seia o'o lava i nai fanau.

Vauele Tuitolova'a (FK)

FAITAUGA MO LE MASINA O AUKUSO – 2022 TAUSAGA C

O le Tusi i Eperu – mo le isi fa vaiaso i luma ua tatou faitau mai le Tusi i Eperu, e manatu o se tusitusiga ua maoa'e lona fa'atulagaina ma se Tusitusiga Pa'ia ua polesi lelei. Na tusia e se tusi tala e lē o mailoa lona suafa e aga'i i se fa'apotopotoga e lē o mailoa fo'i, ua fa'aolaola ai se telosia atamai o Keriso le Ositaulaga Sili o ana faigataulaga na lē toe faia ai le feagaiga na muamua atu. O le tusi tala na fa'apea e maualuga lona iloa o Tusitusiga Pa'ia Eperu. O faitauga ua faia mo ni vaiaso i luma ua aumai ai vaega mulimuli o le tusi o lana fa'aaliga fa'atelosia ua aumaia se mata'itū mo le ola ai o le fa'atuatuga Kerisiano i le fa'aletino, fa'amalosi'au i le au fa'alogologo ina ia tumau pea i le fa'amaoni e ui i puapugā ma le tete'e.

ASO 7 AUKUSO ASO SA 19 TAUSAGA MASANI:

Faitauga muamua: Poto 18: 6 – 9. Matua: E pei ona e fa'asalaina o matou fili, e fa'apea fo'i ona e fa'amamalu iā i matou ona ua e vala'auina i matou.

Salamo: 33: 1, 12 (tali), 18 – 19 (tali), 20, 22 (tali). Tali: Amuia le nu'u ua filifilia e le Ali'i e fai mona lava tofi.

Faitauga lona lua: Eperu 11: 1 – 2, 8 – 19. Matua: Na ia fa'atalitali i se a'ai ua fa'avaeina, o lona mata'isu ma le **tufuga** o le Atua lea.

Aleluia, Aleluia...O a'u nei le ala, ma le upu moni, ma le ola; e lē alu atu lava se tasi i le Tamā, pe a lē ui mai iā te a'u...Aleluia.

Evagelia: Luka 12: 32 – 48. Matua: Ia nofo sauni outou.

Tofitofiga o le Upu:

O se tasi o mafua'aga ua toe fai mai ai o le Tusi i Eperu na tusia i se fa'aotopotoga o tagata Iutaia o se fa'asino tele o ni tala ma a'oa'oga mai tusi pa'ia a Iutaia. O le faitauga o le asō o se fa'ata'ita'iga masani. Ua sa'oloto lava lē na tusia e aumai se finauga mai tala a Aperā'amo ma Sara (ma i le vaega e lē o ta'ua, fa'apea isi o lo'o mulimuli mai le vaega lenei, ua ia aumaia na o sina va'ai i le tele o isi lauiloa o le Feagaiga Tuai) ona ua ia iloaina o ana au faitau o le a malamalama lelei atoatoa. I se auala tutusa i le finauga a Paulo ia Roma mataupu 4 o lo'o fa'amamafa mai e lē na tusia le auala na alu atu ai Aperā'amo i se nofoaga e lē mailoa ma nofo ai i le fa'atuatua i le fa'amaoni o le Atua i ana upu; e fa'apea fo'i (e lē pei o Paulo) ua fai mai se mea e fa'atua ia Sara – na talitonu Sara o le a avatu e le Atua se alo e ui i ona tausaga ma lona matua ua i ai. O le Fa'aepuru o se feagaiaga fa'atelosia na tusia ma le fa'aeteete, ae e lē mo ia lava – aemaise mataupu na mulimuli mai ua ofoina mai fa'apitoa ina ia fa'amalosi'au le au fa'alogologo ina ia onosa'i i le fa'amaoni. O Aperā'amo ma Sara (ma isi) ua ofoina atu o ni fa'ata'ita'iga o le fa'atuatua – fa'atuatua ina i mea e lē va'aia ae o lo'o manino lelei lona folafolaina mai. E fa'apea fo'i mo latou na mua'i taliaina o lenei Tusi – ma mo tatou. O le sini lava e tasi o le fa'atuatua na fa'ailoaina isi faitauga mai le Tusi o le Poto ua fa'asino i le patipatia o le Paseka i le taimi o le Esoto – le taimi ina ua tu'uina atu e Isaraelu lana fa'atuatua i le Atua ma na mauaina ai le sa'olotoaga mai Aikupito. O le faitauga mai le evagelia a Luka ma lana vala'au ina ia mataala ma moli mumū fa'atalitali mo le sau a le Ali'i o le aiga o se vala'au mo le onosa'i e ui e foliga mai e leai se mea o tupu, ona o le fa'aso'oina e fa'amoemoe, e lē o le faia o poloa'iga tusitusia, ae i le fa'atuatua ina i le tasi ua ta'ua o le Ali'i.

ASO 14 AUKUSO ASO SA 20 TAUSAGA MASANI:

Faitauga muamua: Ieremia 38: 4 – 6, 8 – 10. Matua: Ua e fanaua mai a'u o le tagata finau i nu'u uma.

Salamo: 40: 1 (tali), 2 (tali), 3 (tali), 17 (tali). Tali: Le Ali'i e, ia vave ona e fesoasoani mai iā te a'u.

Faitauga lona lua: Eperu 12: 1 – 4. Matua: Ia tatou taufetuli ma le onosa'i i le ala tonu.

Aleluia, Aleluia... Afai e alofa mai se tasi iā te a'u, e tausi e ia upu; e alofa fo'i lo'u Tamā iā te ia; e o mai fo'i i ma'ua iā te ia, matou te nonofo ma ia... Aleluia.

Evagelia: Luka 12: 49 – 53. Matua: 'Ou te le'i sau e avatu le filemū, a o le fevaevaea'i.

Tofitofiga o le Upu:

O se tasi o elemene tāua a le Ekalesia Katoliko o a'oa'oga fa'avae o le fa'apotopotoga o tagata pa'ia (sagato/sagata), ona o Kerisiano uma e auai ia Keriso o le mea lea e auai le tasi i le isi; ma o lenā auai e lē muta i tagata ta'ito'atasi fa'aletino o lo'o i ai. O le fa'aaloaloina o tagata pa'ia ta'uta'ua a le Ekalesia ua maua mai ai ni fa'aosofiaga e lē mafai ona fuaina i le tele o Kerisiano i seneturi e tele ma o lo'o tumau ai pea o ni elemene autū i le fa'atinoina ma tapua'iga a le Ekalesia. O se mea lenā o lo'o i ai manino i le fa'amalosi'au a lē na tusia le Tusi i Eperu. O se mea na muamua mai i le vaega lea o le Tusi, o lē na tusia ua avatu se āta olaola o toa o le fa'atuatua o a latou tala ua toe fa'amatalaina i le Feagaiga Tuai – tagata sa malosi i le fa'atuatua na mafai ai ona tauave so'o se ituaiga o tete'e ma fa'asauaga i la latou taumauga i le Atua. O le āo lenā o molimau i itū uma o lē ua tataua ona avatu se fa'amalosi'au fa'apenei i le au talitonu, o e i fa'ata'ita'iga ua fa'aosofiaina ai i latou mai a latou metitasio ua fesoasoani ia i latou: Le au pa'ia uma o e na fa'atinoina lou finagalo i tupulaga uma (Tatalo o le Eukalisitia) a o le fa'atasia ma tagata pa'ia o se moni e tāua o le fa'atuatua, e lē ave'eseina mai ai

le matafaioi autū a Keriso: ‘Aua ne’i alu ‘ese la tatou va’ai ia Iesu’. Ona o la latou vafeagai ma Keriso ua i ai se nofoaga mo tagata pa’ia i a’oa’oga Kerisiano, ma o le latou so’otaga tonu lea iā te ia ua faia ai le tu’u fa’atasia ma le au papatiso i le lalolagi. E pei o le faitauga mai Eperu ua gata i le lu’itau i le au fa’atuatua i le i’uga, ua fa’apea le faitauga mai ia Ieremia ma le evagelia o le asō ua i ai fo’i le mata’itū tāua i mana’oga o le fa’aso’oina. E masani ona i ai Ieremia i se tulaga e lē fiafia i ai le au ta’ita’i o le malō ona o le Upu a le Atua, ma tagi i le fa’anoanoa lana vala’auina (ua ta’ua o le kofesia a Ieremia). I le evagelia o upu fa’anoanoa a Iesu e masalomia ua atagia mai ai le mea masani a o’o iā i latou na ulua’i mulimuli atu iā te ia o ni fa’asauaga ma tuli ‘ese mai aiga o ni i’uga o le au atu ma le tausisi iā Keriso atonu o ni faigatā i nisi o taimii le olaga i aso uma i Sisifo e manatuaina i le tele o isi nofoaga mai tausaga e tele, o latou sa fa’amaopo mai Keriso e masani ona puapugatia tele ona o lenā. O le lu’itau e masani e le evagelia ona tau’ave o se mana’oga ogaoga, e pei ona fa’amanatu mai e nei faitauga iā i tatou.

ASO 21 ASO SA TAUSAGA MASANI:

Faitauga muamua: Isaia 66: 18 – 21. Matua: Latou te aumaia o outou uso uma mai nu’u uma.

Salamo: 117: 1 (tali), 2 (tali). Tai: O atu ia outou i le lalolagi uma, inā tala’i atu ai le tala lelei.

Faitauga lona lua: Eperu 12: 5 – 7, 11 – 13. Matua: O lē ua alofagia e le Ali’i, ua a’oa’i o ia iā te ia.

16

Aleluia, Aleluia... Afai e alofa mai se tasi iā te a’u, e tausia e ia la’u upu; e alofa fo’i lo’u Tamā iā te ia; e o mai fo’i i ma’ua iā te ia, matou te nonofo ma ia... Aleluia.

Evagelia: Luka 13: 22 – 30. Matua: E o atu tagata mai sasa’e ma sisifo, e tā’o’oto i le mālō o le Atua.

Tofitofiga o le Upu:

Ua tatou maua se fa’atasiga mata’ina o faitauga o le asō. I le faitauga muamua mai le perofeta o Isaia, o lo’o i ai se lisi o nofoaga ‘ese’ese mai tulimanu mamao o le lalolagi ua iloaina nei, ma folafolaga o tagata mai ia nofoaga o le a potopoto i le Ali’i ma folafola lona mamalu. O lenei fua fa’alalolagi a Isaia ua tupu i vaega ‘ese’ese o tusitusiga na faia e le perofeta, ua fa’aalia se Atua e mafai ona pa’i atu i tagata ‘ese ma fa’apaupau ma tosigā mai i latou i lana lafu – ma ioe, o le a’afiaga e mai na tagata ‘ese o nisi o le a vala’auina e aveā ma ositaulaga ma le au Levi. O le fa’aaliga o se tasi o le alofa a le Atua e a’apa atu ma valaa’uina i le fiafia e fa’avavau tagata ‘ese’ese ma nu’u uma. I le evagelia i lona fa’atusatusaina ua i ai tagata ua masani ma le i ai fa’aletino o le Ali’i ua le mautonu: ‘na tatou a’ai ma inu i ou luma; na e a’oa’o fo’i i o matou ala’. O se lu’itau moni lenei mo latou atonu i vaiaso ta’itasi ua fa’alogo i a’oa’oga a le Ali’i, ma latou ua a’ai ma inu fa’atasi ma ia i le Eukalisitia, ae e lē manatu latou te fa’alogoina upu mata’u: ‘ou te lei iloa outou pe maifea.’

ASO 28 AUKUSO ASO SA 22 TAUSAGA MASANI:

Faitauga muamua: Sirako 3: 19 – 21, 30 – 31. Matua: Ia e fa’amaulalo, ona alofagia mai lea o oe e le Atua.

Salamo 68: 3 – 4 (tali), 5 – 6 (tali), 9 – 10 (tali). Tali: Le Atua e, o lou alofa na e saunia ai mo lē ua puapugatia.

Faitauga lona lua: Eperu 12: 18 – 19, 22 – 24. Matua: Ua o’o outou i le mauga o Siona, ma le ‘a’ai o le Atua soifua.

Aleluia, Aleluia...Ua ‘ou ta’ua outou o uō, auā ua ‘ou fa’ailoa atu iā te outou mea uma na ‘ou fa’alogo ai i lo’u Tamā...Aleluia!

Evagelia: Luka 14: 1, 7 – 14. Matua: O sē fa’amauuluga e ia iā te ia, e fa’amauualoina lea, a o lē fa’amauulalo e ia iā te ia, e fa’amauulugaina lea.

Tofitofiga o le Upu:

I le Tusi Pa’ia e masani ona tatou faitau i le fa’aupuga ‘atali’i ulumatua.’ I le tele o aganu’u o le atali’i ulumatua e i ai lona tulaga fa’apitoa – i aigā tupu e masani o lenei atali’i e fuafua i ai lē e suli e soso’o mai. O le tulaga a le ulumatua ua mautū ma o lona tulaga e lē fesiligia. Mo le tele o aganu’u i sisifo e mafai ona va’aia lenei faiga o se pule fai to’atasi ma le malosi ma e lē amiotonu – o lo’o i ai se finauga malosi i le faiga tutusa ma lona tāua mo tagata uma e ui i lona itupā, tausaga po le tulaga. E ui o le fautuaga mai Sirako, le faitauga muamua, e mafai ona fa’alogoina e lagolago, e lē o ta’ua le tau o tagata ta’ito’atasi e ui i o latou tulaga. O a’oa’oga a Iesu i le Evagelia o lo’o manino lelei mai, ma ua gaiioi atu ai le finauga aga’i i luma. Mo Iesu o latou e sili atu le tāua o latou ia e lē fa’atāuaina ma le au fa’atauva’a – o latou e lē amana’iaina e le sosaiete. O lenā a’oa’oga e masani o se lu’itau i se so’o a le Ali’i – ona o tagata uma lava e masani ona tali atu i tulaga fa’asosaiete a isi. O le faitauga mai le Tusi i Eperu ua toe fa’aopopoina mai se isi va’aiga sili i lea mataupu. O se āta matagofie o le Ierusalema fa’alelagi ma agelu uma ma le ekalesia atoa ua potopoto fa’atasi i faiga talosaga ma vi’ivi’iga o se fa’aeaea moni aemaise o lo’o finau mai le tusi tala o le nofoaga lenei ua tatou i ai nei. Ona o ni suli o le tino o Keriso, o Kerisiano ua i ai lo latou nofoaga i le suniga fa’alelagi – ua sili atu lona fua i lo mea na tupu i tagata Eperu i le ta’ita’iga a Mose i le Mauga o Siona i le feiloa’iga ma le Atua i le taimi o le Esoto (le malaga ‘ese atu mai Aikupito). Ma o lo’o fa’amamafa mai e lē na tusia le tusi o le au fa’atuatua ta’ito’atasi na fa’avaeina le Ekalesia atoa o se ‘atali’i ulumatua ma se sitiseni o le lagi’. O le mata’utia tutusa o lo’o fa’amatala mai e tatau ona avea ma punā vai o fa’aosofiaga ma le fa’amalosi’au tele iā i latou ua faitauina i latou lava fa’atasi ma latou ua fa’ailoaina Iesu o le Ali’i ma a’afia i le atia’e o le Ekalesia, ma i se ta’ita’iga manino lelei pe fa’apefea ona feagai atu i isi.

FAITAUGA MO LE ASO SA MUAMUA O SETEMA 2022

ASO 4 SETEMA ASO SA 23 TAUSAGA MASANI:

Faitauga muamua: Poto 9: 13 – 19. Matua: O ai se tagata na te mafaia ona fua le atamai o le Atua.

Salamo: 90: 3 (tali), 5 – 6 (tali), 12 – 13 (tali), 14, 17 (tali). Tali: Le Ali’i e, ua fai oe ma mea matou te nonofo ai i lea tupulaga ma lea tupulaga.

Faitauga lona lua: Filemoni 9 – 10, 12 – 17. Matua: Inā e talia mai o ia, o lo’u lava tino ia.

Aleluia, Aleluia...Ua ou ta’ua outou o uō, auā ua ‘ou fa’ailoa atu iā te outou i mea uma na ‘ou fa’alogo ai i lo’u Tamā...Aleluia!

Evagelia: Luka 14: 25 – 33. Matua: E fa’apefea fo’i so outou e lē lafoa’i ana mea uma, e lē mafai ona fai o ia mo’u so’o.



FA'ASOLOGA O MISASA – AUKUSO 2022

Aso Sa muamua	09.00am	Seatoun	Patele Taisali
Aso 7 Aukuso 2022	11.30am	Titahi Bay	Leai se Misasa
	11.00am	Porirua	Patele Andrew
Aso Sa Lua			
Aso 14 Aukuso 2022	12.00	Te Awakairangi	Leai se Misasa
Aso Sa Tolu			
Aso 21 Aukuso 2022	11.00am.	Newtown	Patele Taisali
	11.00am	Holy Family	Patele Andrew
Aso Sa Fa			
Aso 27 Aukuso 2022	09.30am	Te Wairua Tapu - Petone (Wainuiomata & Petone)	Patele Taisali
	11.30am	Stokes Valley	Patele Maleko



Mikaele Teofilo:



m.teofilo@wn.catholic.org.nz



+64 4 496 1707



021 0818 5037



PO Box 1937, Wellington 6140, New Zealand